



Акафист

святым мученикам Виленским Антонию, Иоанну и Евстафию

Кондак 1

Избраннии Богом для свидетельства православныя веры, мужески попрасте, святии мученицы, языческое нечестие, и за ваша страдания нетленными венцы от Христа Бога увенчаестеся; темже мы, ублажающе вашу память, всеумиленно взываем к вам: Радуйтесе, святии мученицы, Антоние, Иоанне и Евстафие.

Икос 1

Ангели земнии и человецы небеснии явистесе, святии мученицы, егда озарившесе светом истиннаго богопознания, радостно потекосте на страдальческий подвиг. Приимите убо от нас хвалебное пение сие:

Радуйтесе, богоблаженнии исповедницы православныя веры, издревле насажденныя в земли Российско-Литовской;

Радуйтесь, неумолкающие глашатаи истинного благочестия.

Радуйтесь, велии подвижницы, ни во чтоже вменивши славу мира сего, да Христа приобретете;

Радуйтесь, возлюбивши Христа Бога всем вашим сердцем и всею душою.

Радуйтесь, кровию вашею запечатлевши любовь вашу к Господу Иисусу;

Радуйтесь, святии мученицы, Антоние, Иоанне и Евстафие.

Кондак 2

Видяще, яко нетленные мощи ваша даруют всем, притекающим с верою, исцеление от болезней душевных и телесных, благодарим милосердаго Бога, прославившаго вас, святии мученицы, такую благодатию, и вопием Христу Спасителю: Аллилуиа.

Икос 2

Разумныя очеса ваша вперивше в познание истинныя веры, вы, святии братья Антоние и Иоанне, мужемудренно отвергостесь языческаго прельщения, и за исповедание единого

истиннаго Бога радостно приясте узы, темничное заключение, раны и лютую смерть. Таковому подвигу вашему поревновав, и юный Евстафий, небаязненно исповедал себе христианина быти, и сподобился таких же лютых за Христа мучений и смерти. За таковое ваше, еже за Христа, святое дерзновение зываем к вам сице:

Радуйтесь, блаженная троице честных страстотерпцев, прославивших истиннаго Бога, во Святей Троице покланяемаго, Отца, Сына и Святаго Духа;

Радуйтесь, доблии воины Христовы, сохранившии верность ко Владыце до смерти.

Радуйтесь, не убоявшиися претерпети за Христа никих мук;

Радуйтесь, яко ни теснота, ни узы, ни страдания, ни самая смерть не могли разлучити вас от любви Христовой.

Радуйтесь, изгнанныи, поруганныи и убиеннии правды ради, яко мзда ваша многа на небеси;

Радуйтесь, святии мученицы, Антоние, Иоанне и Евстафие.

Кондак 3

Силою Вышняго укрепляеми, небрегосте, святии мученицы, тяжкаго страдания ваших телес, преданных мукам, и на мучения, аки на брачный пир, радостно текосте; мы же благодарственно взываем укрепившему вас Христу Богу: Аллилуиа.

Икос 3

Имуще крепкую надежду на Небеснаго Царя и Бога и помняще апостольское слово, яко подобает повиноватися Богу паче, нежели человеком, вы, святии мученицы, не повинустеся велению вашего мучителя, еже возвратитися к прежнему языческому нечестию:

Радуйтеся, убо исповедавший Христа пред человеки и от Него исповеданныи пред Отцем Небесным;

Радуйтеся, вернии слуги Христовы, за верность свою наследовавши Царствие Небесное.

Радуйтеся, сожителие ангелом и приснии всем святым;

Радуйтеся, водвореннии в невечернем дни Царствия Божия.

Радуйтесь, призирающие с небеси на земную братию вашу и молящиеся о всех, призывающих вас на помощь;

Радуйтесь, святии мученицы, Антоние, Иоанне и Евстафие.

Кондак 4

Буря ярости ваших мучителей не поколебала крепкой вашей веры, надежды и любви к Спасителю Богу, и вы, святии мученицы, ревностно упреждасте друг друга в тяжких страданиях, воспевая Богу в сердцах ваших: Аллилуиа.

Икос 4

Слышана бысть по всей православной земли радостная весть, яко вы, святии мученицы, подвигом добрым подвизаетесь, течение ваше добре скончате и веру до конца соблюдете. Сего ради мы со всею Православною Церковию ублажаем вас:

Радуйтесь, исполнивши слово Христово, еже претерпевый до конца, той спасен будет;

Радуйтесь, вашим терпением удививши мучителей ваших.

Радуйтесь, примером вашей жизни и смерти обративши многих ко Господу;

Радуйтесь, яко и ныне чудесами, истекающими от святых ваших мощей, вы укрепляете православную веру в людех.

Радуйтесь, яко за терпение ваше соблюдеся вам венец правды на небеси;

Радуйтесь, святии мученицы, Антоние, Иоанне и Евстафие.

Кондак 5

Боготечными звездами православныя веры бысте вы, святии мученицы, для ваших земных соотчичей, указуя для них в Православной Церкви единый надежный путь ко спасению, да вси единым сердцем и едиными усты взывают спасающему Богу: Аллилуиа.

Икос 5

Видено бысть чудное знамение Божией благости, егда честное место ваших страданий озарил свыше облачный столп, указующий вам путь к небеси, яко же древле израильтяном из Египта в землю обетованную. Сего ради воспеваем к вам:

Радуйтесь, чада новаго Израиля, достигшии горняго Небеснаго Иерусалима;

Радуйтесь, добре прошедшии многотрудное странствие ваше в пустыни сея жизни и вселившиися в стране обетованной вечной.

Радуйтесь, яко не Моисей, но Сам Христос Бог бысть для вас вождем к Небесному Отечеству;

Радуйтесь, победившии всех ваших супостатов и противников на пути к Царствию Небесному.

Радуйтесь, блаженнии небожители, вкушающии вечная блага, ихже око не виде, и ухо не слыша, и яже на ум человеку не въздоша.

Радуйтесь, святии мученицы, Антоние, Иоанне и Евстафие.

Кондак 6

Проповедуют святыя мощи ваша паче всякаго красноречия несомненную надежду всеобщаго воскресения, егда Бог, не дающий и ныне преподобным Своим видети истление, воззовет к пакибытию весь род человеческий, и вси сподобльшиися стати одесную Престола Господня воспоют Ему: Аллилуиа.

Икос 6

Возсия новый свет для всея Российския земли, егда милосердый Бог явил величие Своих чудес над вашими нетленными мощами, яже страха ради иноверческаго вторицею сокрыты быша в недрах земли под спудом храма, и оттоле источаху обильныя исцеления всем, с теплою молитвою прибегавшим к вашей честной иконе. Приимите же от нас, святии мученицы, сие усердное славословие:

Радуйтесь, светозарныя светила Христовой Церкви, не могущия сокрытися под спудом;

Радуйтесь, скории врачи душ и телес наших.

Радуйтесь, защитники наши от зловредных иноверческих мудрований;

Радуйтесь, светлии вожди наши к истинному богопознанию и богопочтению.

Радуйтесь, усердные молитвенницы наши пред Господом;

Радуйтесь, святии мученицы, Антоние, Иоанне и Евстафие.

Кондак 7

Хотяще прославити Господа Бога, дивнаго во святых Своих, не обретаем довольных слов еже благохвалити Его по достоянию; но вас, святии мученицы, призываем на помощь, молитесь за ны прилежно, да неосужденно дерзаем воспевати Господу: Аллилуиа.

Икос 7

Новоявленными мучениками нарекла вас Православная Церковь, яко мать, веселящаяся о чадах своих; и якоже древнии мученицы по всей вселенней своими страданиями утвердиша Божественную веру, подобие им и вы, новоявленнии мученицы, тако утвердисте святую веру в месте земнаго отечества вашего, яко никия козни иноверия не могут поколебати ея, и мы, благодаряще, взываем к вам:

Радуйтесь, твердии столпы православия, ими же красуется и укрепляется Святая Церковь;

Радуйтесь, искуснии кормчии, благонадежно ведущии нас среди временных волнений к пристанищу вечныя жизни.

Радуйтесь, споспешницы нашего оправдания;

Радуйтесь, яко молитвами вашими мы избавляемся от всякаго лукаваго прельщения, ищущаго уловити души наша.

Радуйтесь, благодетели наши, указующии нам, путь ко спасению.

Радуйтесь, святии мученицы, Антоние, Иоанне и Евстафие.

Кондак 8

Странное и для ума человеческого непостижное, обаче явнозримое нами чудо всемогущества Божия является в нетлении святых ваших мощей, яже больше полутысящи лет пребывают невредимы от разрушительных стихий и от времени всепоядающаго, воздвизая нас со умилением пети Господу: Аллилуиа.

Икос 8

Вся радости века сего, всю честь вашего звания и всю крепость ваших сил принесосте, святии мученицы, в жертву Спасителю Богу, и сподобистесь от Него мздовоздаяния на небеси, идеже ни червь, ни тля тлит, ни татие не подкапывают и не могут похитити дарованнаго вам наследия:

Радуйтесь, убо, мудрии искатели Царствия Божия, подобнии евангельскому мужу, иже обрет на селе сокровище сокровенно, вся продает, елика имать, и купует то село драгоценное;

Радуйтесь, обретшии един многоценен бисер, иже есть Царствие Божие, и за него отдавшии вся блага мира сего.

Радуйтесь, паче мудрых века сего уразумевшии цену бытия земнаго;

Радуйтесь, святии проповедницы, возвещающии нам из вашего гроба, яко недостойны суть страсти нынешняго времени к хотящей явиться славе грядущаго Царствия.

Радуйтесь, граждане небеснии и сонаследницы всем святым;

Радуйтесь, святии мученицы, Антоние, Иоанне и Евстафие.

Кондак 9

Всякия скорби, болезни и прилоги наша вы утоляете, святии мученицы, и темныя зраки лукавых бесов далече от нас отгоняете, да тако вашею помощию, благодатию же Божиею

спасаеми, благодарным и радостным гласом воспеваем Богу: Аллилуиа.

Икос 9

Витийство человеческое немотствует, тщащеся восхвалити вас, святии мученицы, за ваша страдания, яже претерпесте Христа ради, и за вашу мученическую смерть. Обаче любовью вашею побеждаеми, елико можем, ублажаем вас:

Радуйтесь, возвеселивши весь ангельский лик вашим за Христа терпением и страданием;

Радуйтесь, дружелюбно принятыи на небеси от всего сонма праведников и угодников Божиих.

Радуйтесь, яко представше Престолу Господню, сподобилися есте поклонитися Ему и получитьи от Него вечную награду;

Радуйтесь, обитающии во светлостех святых, идеже несть болезнь, ни печаль, ни въздыхание.

Радуйтесь, утешители всех гонимых и терпящих за Христову веру;

Радуйтесь, святии мученицы, Антоние, Иоанне и Евстафие.

Кондак 10

Спасения и вечнаго покоя достигше после многоскорбных земных жизни, вы и нас, святии мученицы, поучаете, яко един есть истинный путь ко спасению в сем мире злом и лукавом, еже вся благодушно терпети Христа ради, воспевающе Ему усердно: Аллилуиа.

Икос 10

Стены пещернаго храма, идеже нетленно почивают ваша цельбоносная телеса, просвещаются, аки небесный чертог, и вси жаждущии спасения прибегают к вам, святии мученицы, с мольбами, с благодарением и с славословием:

Радуйтеся, помощницы наши в скорбех, болезнях и печалех;

Радуйтеся, ходатаи наши пред Престолом Небеснаго Судии живых и мертвых.

Радуйтеся, яко никто же прибегая к вам помощи ради отходит от вас тощ;

Радуйтеся, щедрии подателие нам Божией милости.

Радуйтесь, обрадованныи на небеси и нас на земли укрепляющи в радостной надежде вечнаго спасения;

Радуйтесь, святии мученицы, Антоние, Иоанне и Евстафие.

Кондак 11

Пению ангельскаго лика на небеси совокупльше ваши преподобныя гласы, вы, святии мученицы, купно с небесными чины непрестанно славите Господа Бога; и мы, недостойнии, уповающе на милосердие Божие, дерзаем на земли бранными устами и благодарным сердцем воспевати Ему: Аллилуиа.

Икос 11

Светозарнаго дне всеобщаго воскресения и страшнаго суда Божия чающе, ужасаемся лютых наших деяний и безмерных грехов, ими же ежечасно прогневаем Создателя и Спасителя нашего; но имея вас, святии мученицы, предстательствующих за ны пред Господом, благодарственно взываем к вам:

Радуйтесь, яко мы по Бозе и по Пречистой Приснодеве Богородице все наше упование на нас возлагаем;

Радуйтесь, яко вы не посрамите нас от чаяния нашего.

Радуйтесь, яко молитвами вашими мы уповаем получить отпущение грехов и жизнь вечную;

Радуйтесь, благословеннии Отца Небеснаго, наследовавшии уготованное вам Царствие от сложения мира.

Радуйтесь, яко и мы вашим заступлением чаем избежать участи стоящих ошуюю Престола Судии;

Радуйтесь, святии мученицы, Антоние, Иоанне и Евстафие.

Кондак 12

Благодать чудесных исцелений и скорого предстательства за нас пред Господом имуще, не преставайте, святии мученицы, выну помогати нам, славящим о вас Христа Бога и вопиющим Ему: Аллилуиа.

Икос 12

Поюще ваше светлое прославление на небеси и на земли, благодарим Всемилостиваго Спаса и Бога нашего, яко содержи в Своей руце

времена и лета, благоволил прославити и явити нам вас, святии мученицы, в благопотребное для нашего спасения время, да не погрязнем в тимении пагубных страстей и неразумных стремлений; сего ради возсылаем к вам наше усердное благохваление:

Радуйтесь, неусыпнии стражи нашего спасения, берегущии нас от всякаго навета неприязненнаго;

Радуйтесь. хранителие наши, удаляющии от нас всякое вредное искушение.

Радуйтесь, искуснии наставницы наши в непоколебимом и твердом исповедании православныя веры;

Радуйтесь, громогласнии органы благодати Божией, наполняющей Православную Церковь.

Радуйтесь, великии соотчичи наши, всем нам желающии и помогающии спастися;

Радуйтесь, святии мученицы, Антоние, Иоанне и Евстафие.

Кондак 13

О преславнии и святии мученицы: Антоние, Иоанне и Евстафие! Примите сие малое, но усердное моление наше, и ходатайством нашим

у Христа Бога избавьте нас от всех болезней душевных и телесных, и от всякаго прилога вражия, и от всякия беды и напасти, да выну, благодаряще о вас Господа Бога, радостно воспеваем Ему: Аллилуиа.

(Этот кондак читается трижды, затем икос 1 и кондак 1)



**ПОЛНЫЙ
АКАФИСТНИК
КАНОНИЧЕСКИЙ**

**АКАФИСТЫ
КО ГОСПОДУ БОГУ
ПРЕСВЯТОЙ
БОГОРОДИЦЕ
АРХАНГЕЛАМ
И АНГЕЛАМ**

І

**НУЖЕ
НЕБО**